

# Laschè il luf or dal satg

Il Cussegl federal metta en consultaziun l'ordinaziun tar la nova lescha da chatscha

DA MARTIN CABALZAR/FMR

■ **Cun la nova lescha da chatscha che vegn en votaziun il settember vul la Confederaziun schlucclar la protecziun dals lufs. Cun la publicaziun da l'ordinaziun correspundenta vul il Cussegl federal procurar per trasparenza anc avant la votaziun.** En vista a la votaziun davart la revisiun da la lescha da chatscha dal settember metta il Cussegl federal gia uss en consultaziun l'ordinaziun che regla ils detagls. La votaziun dal pievel è daventada necessaria suenter che las organisaziuns da la protecziun da l'ambient e dals animals han prendì il referendum encunter la lescha deliberada dal Parlament.

## Il luf resta vinavant protegì

Er en la lescha revedida resta il luf in animal protegì che na dastga betg vegnir sajettà, sco quai ch'il Cussegl federal punctuescha. Il Cussegl federal propoia al pievel d'approvar la nova lescha da chatscha, el accentuescha dentant era ch'ils roschs da lufs duajan vegnir mantenids vinavant. Uschia saja per exempel vinavant scumandà da sajettar lufs or d'in rosch sche quel sa chattia lunsch davent da l'intschess abità u da las muntaneras. Avant che sajettar in luf stoppian ils chantuns motivar vers la Confederaziun daco ch'il luf en dumonda sto vegnir eliminà. Ils

chantuns èn obligads da resguardar las proporziuns. Plinavant èn els obligads d'infurmar ils purs davart mesiras per la protecziun da las muntaneras.

## Nagina chatscha sin lufs-tscherver e sin casturs

Sper il luf enumerescha l'ordinaziun mo duas ulteriuras spezias che dastgan vegnir reguladas: il capricorn ed il cign

dumesti. Per impedir ina «chatscha stravagada sin trofeas» vegn la schluppetada da capricorns vegls limitada pli fitg.

En zonas da protecziun dastgan en l'avegnir vegnir sajettads capricorns e lufs mo sche quai n'è betg pussaivel ordaifer las zonas.

Per tut ils ulteriurs animals protegids vala tenor il Cussegl federal «ina

protecziun rinforzada». Scumandada è tenor l'ordinaziun cunzunt la regulaziun dal luf-tscherver, dal castur, da l'irun grisch e dal marel grond.

Plinavant oblighescha l'ordinaziun ils chantuns da documentar il svilup d'animals lubids ch'èn regionalmain rars.

Quai dettia la finala a la Confederaziun ed als chantuns la pussaivladad da prender ad uras las mesiras da protecziun necessarias.

## Dus milliuns per la protecziun da las spezias

La lescha revedida preveda era meds finanzials supplementars per ils spazis nativals da la selvaschina. Previ è che Confederaziun e chantuns èn da nov responsabels tant per la planisaziun sco per la realisaziun da las mesiras per proteger las spezias sco lur ambient da viver en ils territoris da protecziun federals sco er en ils reservats d'utschels, mettend a disposiziun per quest intent credits annuals da fin dus milliuns. Plinavant sustegn la Confederaziun finanziailmain ils chantuns per la lavur supplementaradalsguardiaselvaschina. Fin quà steva a disposiziun per quest intent radund in milliun.

Ils guardiaselvaschina procuran tranter auter che la furmazion da roschs da lufs e lur reproducziun u ils viadis stagiuinals dals capricorns vegnian documentads.

## Confederaziun surpiglia ina part dals donns

L'ordinaziun regla era las contribuiziuns da promoziun per prevegnir a donns tras casturs e ludras. Ella fixescha tranter auter en detagl tge mesiras da prevenziun ch'èn supportablas per impedir donns en regiuns populadas da casturs, ludras ed animals da rapina. Tranter questas mesiras tutgan tranter auter era saivs electrifitgadas.

Tenor l'ordinaziun surpiglia la Confederaziun 80 pertschient dals custs che vegnan chaschunads d'animals da rapina e 50 pertschient dals custs chaschunads da casturs, ludras ed evlas.

La Confederaziun surpiglia questa indemnisaziun mo sut la cundiziun ch'il chantun surpiglia ils custs restants e sche las mesiras da protecziun èn ademplidas.

## Damain plum en il terren

Plinavant pretenda l'ordinaziun ch'ils chatschaders prestian mintg'onn l'attest ch'els tutgian il culp/la nota. L'utilisaziun da munizii da chatscha che cuntegn plum vegn per gronda part scumandada.

La nova lescha da chatscha vegn messa en votaziun ils 27 da settember, prest tschintg mais pli tard che previ, causa la pandemia da corona. Tar l'ordinaziun pon ils circuls interessads pigliar posiziun fin ils 9 da settember.



Il luf en il visier da la politica.

ILLUSTRAZIUN M. LUTZ/PARLAMENT.CH